

MESYUARAT KETIGA, PENGGAL KEDUA
PARLIMEN KEEMPAT BELAS
2019

HARI RABU : 13 NOVEMBER 2019

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN KHOO POAY TIONG [KOTA MELAKA]

TARIKH : 13 NOVEMBER 2019 (RABU)

SOALAN

Minta **PERDANA MENTERI** menyatakan langkah-langkah yang telah dan sedang diambil oleh Suruhanjaya Pilihan Raya (SPR) untuk membersihkan daftar pemilih.

**JAWAPAN : YB TUAN MOHAMED HANIPA MAIDIN,
TIMBALAN MENTERI DI JABATAN PERDANA MENTERI**

Yang di-Pertua,

1. Untuk makluman Yang Berhormat, Suruhanjaya Pilihan Raya (SPR) telah mewujudkan **Jawatankuasa Dasar Penambahbaikan Daftar Pemilih** di mana jawatankuasa ini bertanggungjawab membuat penelitian yang menyeluruh terhadap isu-isu yang berkaitan dengan urusan pendaftaran pemilih. Jawatankuasa ini juga akan mengenal pasti mekanisme yang sesuai dan terbaik untuk dilaksanakan oleh SPR bagi maksud pengemaskinian dan pembersihan daftar pemilih selaras dengan peruntukan undang-undang yang sedang berkuat kuasa.

2. Selain itu, **Jawatankuasa Taskforce SPR dan Jabatan Pendaftaran Negara (JPN)** juga telah ditubuhkan bagi tujuan penyelarasan maklumat warganegara berkaitan urusan pendaftaran pemilih khususnya pelaksanaan pendaftaran pemilih secara automatik. Di samping itu, jawatankuasa tersebut juga melihat isu-isu berkaitan

pengesahan maklumat warganegara bagi tujuan pembersihan daftar pemilih.

3. SPR menjalankan urusan pengemaskinian daftar pemilih dari **semasa ke semasa** berdasarkan kepada Peraturan 10 dan Peraturan 25, Peraturan-Peraturan Pilihan Raya (Pendaftaran Pemilih) 2002. Ini termasuklah **memotong nama pemilih yang telah disahkan meninggal dunia** dan **memotong nama pemilih yang telah disahkan melepaskan atau dilucutkan hak kewarganegaraan**.

4. Bagi maksud tersebut, SPR telah membuat pengemaskinian daftar pemilih dengan memotong nama pemilih yang telah meninggal dunia yang meliputi **139,118** nama pemilih pada tahun 2017 dan sebanyak **117,826** nama pemilih pada tahun 2018. Manakala, sehingga 31 Ogos 2019, sebanyak **91,154** nama pemilih yang telah meninggal dunia telah dipotong dari daftar pemilih.

5. Di samping itu, SPR juga telah memotong nama pemilih yang hilang taraf kewarganegaraan yang melibatkan seramai **11,799** rekod. Daripada jumlah tersebut, **4,363** nama pemilih dipotong pada tahun 2017 dan **3,496** nama pemilih dipotong pada tahun 2018. Manakala sehingga 31 Ogos 2019, **3,940** nama pemilih yang hilang taraf kewarganegaraan juga telah dipotong dari daftar pemilih.

6. Pengemaskinian daftar pemilih yang melibatkan pemilih yang telah meninggal dunia dan hilang taraf kewarganegaraan ini adalah berdasarkan kepada maklumat yang diterima daripada JPN.

7. SPR juga meneliti isu-isu berkaitan daftar pemilih seperti isu pemilih berumur 90 tahun dan ke atas, ramai pemilih berdaftar di satu alamat dan isu pesara tentera dan polis yang mengundi sebagai pengundi awal. SPR telah melaksanakan pelbagai usaha menangani isu pemilih berumur 90 tahun dan ke atas dan isu ramai pemilih berdaftar di satu alamat dengan menjejaki mereka di lapangan berdasarkan kepada alamat mereka dan menulis surat untuk mendapatkan pengesahan status mereka.

NO SOALAN : 1

8. SPR juga berkerjasama dengan Polis DiRaja Malaysia dan Angkatan Tentera Malaysia untuk menangani isu pesara tentera dan polis yang mengundi sebagai pengundi awal. Antara tindakan yang dilaksanakan ialah mengemaskini lokaliti mereka ke lokaliti awam dalam bahagian pilihan raya yang sama untuk memastikan mereka mengundi sebagai pengundi biasa jika berlaku Pilihan Raya Umum atau Pilihan Raya Kecil.

9. Selain itu, SPR juga **melaksanakan kerjasama strategik** dengan jabatan/agensi, NGO dan parti-parti politik khususnya dalam membuat penambahbaikan terhadap daftar pemilih yang disediakan oleh SPR.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

DARIPADA : DATO' HASBULLAH BIN OSMAN [GERIK]

TARIKH : 13 NOVEMBER 2019 (RABU)

SOALAN

Minta **MENTERI BELIA DAN SUKAN** menyatakan apakah rasionalnya peruntukan terhadap persatuan belia dipotong serta nyatakan hala tuju belia yang telah direncanakan oleh pihak Kementerian untuk memberi gambaran terhadap masa depan belia negara.

JAWAPAN

Yang di-Pertua,

1. Untuk makluman Yang Berhormat, peruntukan belia tidak dipotong tetapi telah diselaraskan dan distrukturkan semula. Kementerian Belia dan Sukan ingin memberikan tumpuan kepada pelaksanaan program dan bukan sahaja kepada peruntukan berdasarkan kepada wang pentadbiran. Perbezaannya, kini, Kementerian memfokuskan kepada pertubuhan belia itu untuk melaksanakan program di peringkat akar umbi dan untuk memberikan kertas kerja yang boleh diaudit selepas itu, yang akhirnya membolehkan wang tersebut dapat disalurkan kepada aktiviti yang produktif. Jika dibandingkan dengan wang pentadbiran semata-mata, di mana, di setiap daerah menempatkan enam (6) hingga sepuluh (10) pertubuhan belia, dan mereka mahukan pejabat mereka yang tersendiri. Mereka juga mahukan pekerja yang tersendiri tetapi akhirnya wang

SOALAN NO : 2

tersebut yang boleh dikongsikan bersama, tidak dapat dibelanjakan untuk pelaksanaan program di peringkat akar umbi.

2. Untuk membantu pertubuhan-pertubuhan belia, khususnya di peringkat negeri dan daerah, Kementerian Belia dan Sukan akan memberikan diskaun jika mereka ingin mengguna pakai infrastruktur atau fasiliti di bawah Kementerian Belia dan Sukan, supaya pertubuhan belia tidak perlu menyewa pejabat-pejabat di luar.

3. Dari segi pegawai yang bertugas, pertubuhan belia boleh berkolaborasi dengan lebih rapat dengan pegawai Jabatan Belia dan Sukan Negara (JBSN) di peringkat daerah berbanding untuk melantik pegawai-pegawai dalam kalangan mereka sendiri. Perkara ini dapat memastikan bahawa wang pentadbiran yang sebelum ini sukar untuk diaudit, akhirnya boleh disalurkan semula kepada pelaksanaan program yang dapat dirasai oleh semua anak muda di kawasan tersebut.

4. Kementerian juga ingin membuat satu sistem insentif di mana untuk pertubuhan belia, sejajar dengan arus masa dan perubahan, mereka perlu melibatkan lebih banyak wanita dalam struktur kepimpinan. Pada masa yang sama Kementerian juga ingin memberikan insentif bagi pertubuhan belia yang memberanikan diri untuk melantik atau memilih lebih banyak anak muda di bawah umur 30 tahun dan menyerap mereka ke dalam struktur pentadbiran pertubuhan belia tersebut. Dengan itu, hala tuju pada tahun hadapan, Kementerian akan berunding dengan setiap satu pertubuhan belia di peringkat kebangsaan dan untuk memberikan insentif bagi pertubuhan belia yang melantik wanita dan anak muda dan diserapkan dalam struktur kepimpinan di bawah umur 30 tahun serta pada masa yang sama fokus kepada pelaksanaan program, *paperwork-based* jika dibandingkan dengan wang pentadbiran semata-mata.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' ROSOL BIN WAHID
[HULU TERENGGANU]**

TARIKH : 13 NOVEMBER 2019 (RABU)

SOALAN NO. 3

Minta **PERDANA MENTERI** menyatakan:

- a) statistik semasa pengambilan satu peratus pekerja orang kurang upaya (OKU) dalam sektor awam; dan
- b) langkah-langkah menggalakkan lagi penyertaan golongan tersebut dalam sektor tersebut.

**JAWAPAN : YB TUAN MOHAMED HANIPA MAIDIN,
TIMBALAN MENTERI DI JABATAN PERDANA
MENTERI**

Yang di Pertua,

1. Untuk makluman Yang Berhormat, statistik daripada Jabatan Perkhidmatan Awam (JPA) menunjukkan bahawa sehingga 30 Jun 2019, jumlah pengisian OKU dalam Perkhidmatan Awam adalah seramai 3,686 pegawai atau 0.29%.

2. Manakala, statistik urusan pengambilan di bawah Suruhanjaya Perkhidmatan Awam Malaysia (SPA) menunjukkan bahawa pada tahun 2019 (sehingga Jun), seramai 44 orang atau 0.49% calon OKU dilantik ke Perkhidmatan Awam daripada sejumlah 8,924 calon lantikan tetap. Pada tahun 2018 pula, daripada seramai 13,454 pelantikan tetap, SPA

telah melantik seramai 114 atau 0.85% calon OKU ke Perkhidmatan Awam.

3. SPA sentiasa menjadikan sasaran 1% peluang pekerjaan dalam Perkhidmatan Awam kepada OKU seperti yang ditetapkan dalam Pekeliling Perkhidmatan Bilangan 16 Tahun 2010 sebagai asas dalam semua urusan pengambilan. Sungguhpun demikian, pencapaian sasaran ini banyak bergantung kepada kesediaan Kementerian dan Jabatan yang menerima penempatan calon OKU. Ia perlu disesuaikan di antara norma kerja dan jenis ketidakupayaan calon OKU (*job match*). Selain itu, aksesibiliti dan kemudahan OKU di bangunan pejabat atau tempat kerja juga perlu diambil kira bagi memastikan tugas yang diberikan dapat dilaksanakan dengan lancar.

4. Bagi urusan pengambilan calon ke jawatan kontrak, Kementerian dan Jabatan sebenarnya telah diberi kuasa dalam urusan pengambilan calon sebelum diperakukan kepada SPA. Ketua Jabatan berdasarkan kuasa yang diperuntukkan mengikut peraturan yang berkenaan boleh mengenal pasti calon OKU yang sesuai dan berdaftar dengan Jabatan Kebajikan Masyarakat (JKM) untuk dipertimbangkan pelantikan.

5. Bagi menggalakkan dan mempermudah semua calon memohon pekerjaan termasuk juga calon OKU, SPA telah menyediakan sistem pendaftaran pekerjaan secara dalam talian (*online*). Calon OKU boleh mengisi borang SPA8i di Portal SPA pada bila-bila masa dan di mana-mana jua dengan menyatakan status dan kategori ketidakupayaannya. Hebahan mengenai kekosongan sesuatu jawatan pula dibuat melalui iklan yang disebar luas melalui portal SPA dan media-media sosial seperti facebook.

6. SPA juga mengambil langkah mengenakan syarat kelayakan minimum sahaja kepada calon OKU berdasarkan syarat lantikan yang ditetapkan dalam skim perkhidmatan. Ini bermakna, calon OKU yang memenuhi syarat yang ditetapkan di dalam skim perkhidmatan akan dipanggil untuk menghadiri temu duga bagi jawatan yang dipohon. Pengecualian juga diberikan kepada calon OKU dari menduduki *Public Service Entry Exam* (PSEE) sebagai langkah menggalakkan penyertaan OKU dalam perkhidmatan awam. Selain itu, Ahli

NO SOALAN : 3

Suruhanjaya daripada kalangan OKU juga telah dilantik menganggotai Suruhanjaya Perkhidmatan Awam Malaysia.

7. Dalam menyampaikan maklumat dan panduan memasuki Perkhidmatan Awam, SPA sentiasa melaksanakan Program *Outreach* termasuk membuka booth di program-program karnival kerjaya anjuran pelbagai pihak. Pada tahun 2018, SPA telah melaksanakan sebanyak 61 program *outreach* di seluruh negara.

8. Pencapaian 1% OKU dalam Perkhidmatan Awam banyak bergantung pada semua pihak yang terlibat. SPA adalah satu daripada Pihak Berkuasa Melantik (PBM) dalam Perkhidmatan Awam. Selain SPA, pelantikan calon OKU juga turut dilaksanakan oleh PBM yang lain.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

**DARIPADA : YB DATO' SRI HAJAH ROHANI BINTI HAJI
ABDUL KARIM [BATANG LUPAR]**

TARIKH : 13 NOVEMBER 2019

SOALAN

Minta **MENTERI SUMBER MANUSIA** menyatakan tentang perubahan Revolusi Industri 4.0 yang perlu diteruskan dengan baik berikutan perubahan teknologi yang tidak dapat dikekang dalam mendepani arus kemodenan dunia antarabangsa. Adakah Kerajaan bersedia untuk mengatasi tambahan pengangguran yang bakal berlaku dan apa tindakan Kerajaan untuk mengatasi Revolusi Industri 4.0.

JAWAPAN

Tuan Yang di-Pertua,

1. Industri 4.0 dijangka akan memberi kesan yang sangat signifikan kepada pasaran buruh dan pekerjaan seperti pewujudan dan penghapusan pekerjaan (*job displacement*), peningkatan produktiviti buruh dan jurang kemahiran yang semakin meluas. Oleh itu, modal insan negara perlu mempunyai kemahiran yang relevan dan sentiasa memenuhi keperluan pasaran dan ekonomi negara yang dinamik. Dalam hal ini, Kementerian Sumber Manusia (KSM) dan Kementerian Pendidikan Malaysia (KPM) telah diberikan peranan sebagai Pengerusi Bersama bagi menerajui Jawatankuasa Kerja Pembangunan Kemahiran dan Bakat (*Technical Working*

SOALAN NO: 4

Group-Skills) di bawah Industry4WRD yang diterajui oleh Kementerian Perdagangan Antarabangsa dan Industri (MITI).

2. Selaras dengan itu, pelbagai usaha dilaksanakan oleh KSM dalam memperkukuh kompetensi sumber manusia bagi mengenal pasti pekerjaan yang bersesuaian dalam menghadapi Industri 4.0 melalui Jabatan dan Agensi di bawahnya. Langkah-langkah yang diambil oleh KSM adalah seperti berikut:

- (i) menyediakan program *upskilling* dan *reskilling* kepada golongan pekerja bagi mempertingkatkan kemajuan sendiri dalam menyesuaikan diri dengan perubahan keperluan kerja masa hadapan (*future jobs*) serta persekitaran global yang semakin kompetitif dan dinamik;
- (ii) mengadakan sesi libat urus dengan pihak industri bersama jabatan/agensi terlibat bagi memberi gambaran jelas berkaitan Industri 4.0. Maklumat hasil perkongsian daripada sesi ini akan seterusnya digunakan untuk mengkaji dan meneliti keperluan tenaga kerja bagi menghadapi Industri 4.0 seterusnya mewujudkan peluang pekerjaan baharu; dan
- (iii) memperluas akses kepada warganegara untuk mendapatkan Latihan dan Pendidikan Teknikal dan Vokasional (TVET). Sehingga kini, terdapat 562 buah Institusi Latihan Kemahiran Awam (ILKA) yang telah ditubuhkan di seluruh negara dengan pelbagai kursus kemahiran ditawarkan mengikut keperluan industri (sumber: Statistik Pekerjaan dan Perburuhan Siri 19 Bil.1/2019).
- (iv) menyediakan perkhidmatan pekerjaan *JobsMalaysia* yang memberi kemudahan kepada pencari kerja untuk mendapatkan kerja yang bersesuaian melalui pendekatan pemadanan kerja. Bagi memenuhi keperluan semasa dan menambah baik kecekapan pasaran buruh, Portal

SOALAN NO: 4

JobsMalaysia telah dirombak serta dinaikkan taraf dan dikenali sebagai Portal JM2.0 yang telah dilancarkan pada September 2018;

- (v) menganjurkan Program Penempatan Pekerjaan yang merangkumi Karnival Kerjaya, penempatan melalui *Client Account*, Temuduga Terbuka, Program Kerjasama Antara Agensi. Bagi tempoh Januari-Jun 2019, seramai 22,563 orang pencari kerja telah berjaya mendapat penempatan;
- (vi) mewujudkan pusat sehati menggabungkan agensi seperti *JobsMalaysia*, Pertubuhan Keselamatan Sosial (PERKESO), Pembangunan Sumber Manusia Berhad (PSMB).
- (vii) melaksanakan program *Graduates Enhancement Programme For Employability* (GENERATE 2.0) bertujuan membantu golongan muda di kalangan graduan menganggur untuk mengikuti latihan dalam bidang berimpak tinggi.
- (viii) mengukuhkan dan memperkasakan Program Sistem Latihan Dual Nasional (SLDN) melalui pelbagai program dan kerjasama bagi mengurangkan jurang ketidakpadanan kemahiran dengan keperluan industri. Program SLDN menawarkan latihan berasaskan industri dengan 70% latihan praktikal di syarikat dan 30% teori di institusi latihan; dan
- (ix) melaksanakan program *Structured Internship Programme* (SIP) yang diterajui Talent Corp dengan kerjasama Kementerian Pendidikan Malaysia (KPM).

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN MUSLIMIN BIN YAHAYA

TARIKH : 13 NOVEMBER 2019 (KHAMIS)

SOALAN NO. 5

Minta **MENTERI AIR, TANAH DAN SUMBER ASLI** menyatakan apakah perancangan untuk membaik pulih hakisan dan kerentanan pantai khusus di pantai barat Semenanjung terutamanya antara kawasan Sungai Besar.

JAWAPAN

Tuan Yang di-Pertua,

Kerajaan telah meluluskan **Projek Mengatasi Masalah Fenomena Air Pasang Besar Dan Hakisan Pantai Pelbagai Negeri** untuk dilaksanakan oleh Kementerian Air, Tanah dan Sumber Air (KATS) melalui Jabatan Pengairan dan Saliran (JPS) dalam RMKe-11 dengan **siling kos projek** sebanyak **RM200 juta**.

Projek ini adalah bagi mengatasi masalah hakisan pantai di seluruh Malaysia termasuklah di pesisiran Pantai Barat Semenanjung Malaysia **yang turut merangkumi pesisir pantai Sungai Besar**. Pelaksanaan kerja-kerja fizikal di tapak akan dilaksanakan secara berperingkat dan dijangka bermula pada tahun 2020.

Bagi Negeri Selangor, kawasan yang terlibat dengan cadangan menaiktaraf dan pembinaan ban pantai baharu adalah :

- i) Sabak Bernam
- ii) Kuala Selangor
- iii) Klang
- iv) Kuala Langat

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATO' SRI HASAN BIN ARIFIN [ROMPIN]

TARIKH : 13 NOVEMBER 2019 (RABU)

SOALAN NO. 6

Minta **MENTERI HAL EHWAL EKONOMI** menyatakan banyak rungutan di kalangan perunding dalam industri oil and gas masih banyak menggunakan perunding-perunding dari luar negara dan tidak memberi kepercayaan dan peluang kepada perunding-perunding tempatan. Nyatakan berapa ramai perunding luar negara yang masih digunakan oleh Petronas dan apakah bidang dan kepakaran mereka.

JAWAPAN

Tuan Yang di-Pertua,

1. Untuk makluman Ahli Yang Berhormat, Petroliaam Nasional Berhad (PETRONAS) sebagai sebuah syarikat minyak negara yang ditubuhkan di bawah Akta Kemajuan Petroleum 1974 (PDA1974) komited dalam membantu untuk memajukan industri minyak dan gas tempatan. Penglibatan PETRONAS dalam industri hulu dan hiliran dianggarkan 75 peratus daripada keseluruhan industri dalam negara.

2. Untuk tempoh Januari hingga Ogos 2019, syarikat-syarikat perunding tempatan merangkumi lebih 60 peratus daripada jumlah keseluruhan syarikat-syarikat perunding yang dilantik oleh PETRONAS. Bagi skop kerja yang terlalu khusus dan teknikal seperti Kejuruteraan, Pemilikan, Pembinaan dan Pelaksanaan (*Engineering, Procurement, Construction and Commissioning* – EPCC), teknologi proprietari dan digital (ICT), kepakaran tempatan adalah sangat terhad dan perlu diperolehi daripada sumber luar. Sebagai contoh, teknologi pemetaan

seismik laut dalam (*seismic deep water acquisition services*) hanya dimiliki oleh syarikat global, dan kepakaran ini tidak dimiliki oleh mana-mana perunding tempatan atau boleh dibangunkan dalam masa singkat oleh PETRONAS sendiri. Tambahan pula, kerja-kerja yang dilaksanakan oleh perunding luar ini memerlukan kos modal yang tinggi, berteknologi tinggi, kompleks dan rumit kerana lapangan-lapangan minyak dan gas yang ada sekarang adalah di laut dalam (*deep water*) dan mempunyai kadar kontaminan yang terlalu tinggi seperti sulfur, CO₂ dan merkuri. Untuk makluman Ahli Yang Berhormat, hanya terdapat 4 firma global yang menawarkan khidmat *seismic deep water acquisition services*.

3. PETRONAS melantik perunding-perunding atau vendor-vendor dari luar negara untuk memastikan kelangsungan projek dan sasaran kritikal tercapai.

4. Bagi memastikan lebih ramai vendor serta perunding tempatan terlibat secara aktif dan kompetitif di dalam industri minyak dan gas, pelbagai usaha, program serta inisiatif terus dilaksanakan PETRONAS, dengan kerjasama pelbagai kementerian dan agensi seperti Program Pembangunan Vendor (VDP dan VDPX), VDP Inovasi dan Teknologi, Program Lestari, BeyondHome dan program pembiayaan vendor OGSE (*Oil and Gas Services & Equipment*) PETRONAS. Di bawah Program VDP PETRONAS, sebanyak 108 syarikat telah mendapat manfaat dengan nilai kontrak bernilai lebih kurang RM9 bilion setakat Oktober 2019. 4 syarikat VDP tempatan telah disenaraikan di Papan Utama Bursa Malaysia. Manakala 30 VDP tempatan telah beroperasi di luar negara.

5. PETRONAS memandang serius dalam membangunkan kapasiti dan keupayaan perunding-perunding tempatan ini. Sebagai contoh, apabila aktiviti penerokaan dan pengeluaran minyak dan gas PETRONAS di Turkmenistan dan Myanmar, perunding-perunding tempatan ini telah dilibatkan bersama memandangkan infrastruktur dan kepakaran negara tersebut masih terhad dan ini membuka peluang kepada perunding-perunding tempatan ini untuk meneroka pasaran baharu.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : YB PUAN RUSNAH BINTI ALUAI
[TANGGA BATU]

TARIKH : 13 NOVEMBER 2019

SOALAN

Minta **MENTERI SUMBER MANUSIA** menyatakan adakah Kementerian akan menaikkan umur persaraan kepada 65 tahun pada masa akan datang yang mana langkah tersebut tidak optimum kepada kualiti dan perbelanjaan pengurusan.

JAWAPAN

Tuan Yang di-Pertua,

1. Cadangan untuk meningkatkan had umur persaraan kepada 65 tahun merupakan cadangan daripada Pertubuhan Bukan Kerajaan (NGO). Berdasarkan Akta Umur Persaraan Minimum 2012 (Akta 753) yang berkuatkuasa pada 1 Julai 2013 ke atas semua majikan sektor swasta di seluruh Malaysia, menyatakan bahawa umur persaraan minimum seseorang pekerja adalah apabila seseorang pekerja itu mencapai umur 60 tahun. Ini bermakna seseorang pekerja itu boleh terus bekerja walaupun telah melebihi 60 tahun dan ia juga bergantung kepada tawaran pekerjaan oleh majikan. Oleh itu, tiada keperluan pada masa ini untuk meningkatkan umur persaraan kepada 65 tahun kerana ia merupakan pandangan Kerajaan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' TAKIYUDDIN BIN HASSAN [KOTA
BHARU]**

TARIKH : 13 NOVEMBER 2019 (RABU)

SOALAN

DATO' TAKIYUDDIN BIN HASSAN [KOTA BHARU] minta **PERDANA
MENTERI** menyatakan:

- (a) senarai ahli Jawatankuasa Khas Kajian Hukuman Gantian terhadap Hukuman Mati Mandatori yang akan ditubuhkan Kerajaan; dan
- (b) adakah para agamawan seperti mufti serta pihak jabatan agama turut terlibat sama dalam penubuhan jawatankuasa tersebut.

**JAWAPAN : YB TUAN MOHAMED HANIPA MAIDIN,
TIMBALAN MENTERI DI JABATAN PERDANA
MENTERI**

(a) Tuan Yang di-Pertua,

Kerajaan pada 29 Ogos 2019 telah bersetuju agar Jawatankuasa Khas Kajian Hukuman Gantian Terhadap Hukuman Mati Mandatori ditubuhkan untuk mengkaji secara keseluruhan polisi penghukuman (*sentencing policy*) bagi menggantikan hukuman mati mandatori dengan hukuman yang lebih wajar, tertakluk kepada budi bicara Mahkamah.

Komposisi keahlian Jawatankuasa Khas ini adalah terdiri daripada pakar-pakar dalam bidang perundangan seperti bekas Hakim Mahkamah Persekutuan, bekas Peguam Kanan Persekutuan, pengamal undang-undang, pensyarah undang-undang daripada Institusi Pengajian Awam terkemuka dan pakar kajian jenayah (*criminologist*) seperti di Jadual 1 di bawah:

Jadual 1: Senarai Ahli Jawatankuasa Khas Kajian Hukuman Gantian Terhadap Hukuman Mati Mandatori

Bil.	Nama	Jawatan Semasa / Terakhir
1.	YBhg. Tan Sri Datuk Seri Panglima Richard Malanjum	Mantan Ketua Hakim Negara
2.	YBhg. Tan Sri Zaharah binti Ibrahim	Mantan Hakim Besar Malaya
3.	Encik Edmund Bon Tai Soon	Malaysian Centre for Constitutionalism and Human Rights
4.	Encik Andrew Khoo Chin Hock	Majlis Peguam Malaysia
5.	YBhg. Datin Paduka Seri Zauyah Be binti T. Loth Khan	Mantan Peguam Cara Negara
6.	Encik Thang Ah Yong	Mantan Pegawai Kanan Jabatan Penjara Malaysia
7.	YBhg. Dato' Mah Weng Kwai	Suruhanjaya Hak Asasi Manusia (SUHAKAM)
8.	YBrs. Dr. Farah Nini binti Dato' Dusuki	Pensyarah Universiti Malaya (UM)
9.	YBhg. Profesor Madya Dato' Dr. P. Sundramoorthy	<i>Criminalologist</i> di Universiti Sains Malaysia (USM)

(b) Tuan Yang di-Pertua,

Secara amnya, para agamawan seperti Mufti serta Jabatan Agama Islam Negeri tidak dilibatkan secara langsung dalam penubuhan Jawatankuasa Khas ini. Walau bagaimanapun, penubuhan Jawatankuasa Khas ini merupakan komitmen Kerajaan untuk memastikan proses gubalan undang-undang itu sendiri bersifat inklusif, holistik dan efektif dengan memfokus kepada sesi libat urus dan *outreach* yang mencukupi. Justeru, penglibatan pelbagai lapisan masyarakat termasuk para agamawan seperti Mufti serta Jabatan Agama Islam Negeri dalam proses kajian ini melalui pelbagai platform seumpama ini akan diberi perhatian khusus supaya hak individu untuk menyuarakan pandangan tidak diketepikan.

Oleh yang demikian, cadangan pelaksanaan sesi libat urus yang holistik akan melibatkan pelbagai platform seperti :

- (i) sesi *town hall* negeri mengikut zon;
- (ii) sesi *town hall* bersama ahli Parlimen;
- (iii) konsultasi awam secara atas talian;
- (iv) pandangan pakar (*expert opinion*);
- (v) *focus group discussion* bersama pakar-pakar; dan
- (vi) perjumpaan dengan keluarga mangsa dan banduan akhir.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN KESAVAN A/L SUBRAMANIAM

TARIKH : 13 NOVEMBER 2019 (KHAMIS)

SOALAN NO. 9

Minta **MENTERI AIR, TANAH DAN SUMBER ASLI** menyatakan cadangan menaik taraf Sungai Buloh, Sungai Siput (U) di bawah projek tebatan banjir bagi menyelesaikan masalah banjir di kawasan tersebut.

JAWAPAN

Tuan Yang di-Pertua,

Kerajaan telah meluluskan Projek Pembangunan Lembangan Sungai Bersepadu (PLSB) Sungai Perak Fasa 1 untuk dilaksanakan oleh Kementerian Air, Tanah dan Sumber Air (KATS) melalui Jabatan Pengairan dan Saliran (JPS) dalam RMKe-11 dengan siling kos projek sebanyak RM250 juta.

Cadangan menaik taraf Sungai Buloh dan Sungai Siput (U) akan dilaksanakan di bawah projek ini iaitu dalam komponen Saliran Mesra Alam, Projek Saliran Mesra Alam serta Kerja-Kerja Berkaitan, Daerah Kuala Kangsar, Perak Darul Ridzuan. Projek ini kini dalam peringkat proses pengambilan balik tanah.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN ABDUL LATIFF BIN ABDUL
RAHMAN [KUALA KRAI]**

TARIKH : 13 NOVEMBER 2019 (RABU)

SOALAN

Minta **MENTERI BELIA DAN SUKAN** menyatakan:-

- (a) berapa jumlah pertubuhan belia di Kuala Krai yang aktif dan tidak aktif; dan
- (b) berapa jumlah peruntukan yang disalurkan serta apakah kursus yang boleh membantu melahirkan pimpinan belia.

JAWAPAN

Yang di-Pertua,

1. Sehingga September 2019, sebanyak 492 Pertubuhan belia di negeri Kelantan direkodkan berdaftar di bawah Akta Pertubuhan Belia dan Pembangunan Belia 2007 (Akta 668). Pendaftaran ini melibatkan sejumlah 47 pertubuhan belia di Jajahan Kuala Krai dan sebanyak 3 pertubuhan belia di Jajahan Kuala Krai telah dibatalkan pendaftarannya oleh Pejabat Pendaftar Pertubuhan Belia kerana kegagalan mematuhi keperluan Seksyen 22 Akta 668 berkaitan penghantaran Maklumat Yang Kena Diberi (MYKD). Berdasarkan statistik tersebut, 44 Pertubuhan Belia di Jajahan Kuala Krai dikategorikan masih aktif.

2. Berhubung dengan pemberian dana di seluruh Malaysia, melalui tabung persatuan, sebanyak RM6.6 juta setakat ini telah diperuntukkan. Melalui Kumpulan Wang Amanah Sukan, RM23.9 juta telah pun diperuntukkan dan jumlahnya adalah sekitar RM30 juta. Untuk memastikan bahawa pentadbiran pertubuhan belia dapat ditambah baik, Kementerian juga telah menyalurkan bantuan sebanyak RM3,000 kepada pertubuhan belia dalam membantu pelaksanaan Program Majlis Perundingan Belia Negara, di peringkat Jajahan Kuala Krai.

3. Pihak Kementerian melalui Jabatan Belia dan Sukan Negara telah melaksanakan Kursus Kepimpinan Organisasi (KPO) yang bertujuan melatih dan melahirkan pemimpin belia di kalangan Ahli Jawatankuasa dan pelapis kepimpinan pertubuhan belia berdaftar.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : YB TUAN NIK NAZMI BIN NIK AHMAD
[SETIAWANGSA]

TARIKH : 13 NOVEMBER 2019

SOALAN

Minta **MENTERI SUMBER MANUSIA** menyatakan:-

- (a) apakah status program MyAPEC Youth Connect dan MyASEAN Internship; dan
- (b) adakah Kerajaan bersedia meningkatkan program ini mencapai standard VIE International Internship Program, Perancis.

JAWAPAN

Tuan Yang Di Pertua,

1. Talent Corporation Malaysia Berhad (TalentCorp) melalui kerjasama bersama Kementerian Perdagangan Antarabangsa dan Industri (MITI) telah melaksanakan Program *MyASEAN Internship* pada tahun 2015 dan diperluaskan kepada pelaksanaan *MyAPEC Youth Connect* sebagai kesinambungan dan usaha untuk terus memperkasakan takungan bakat negara dengan pengalaman global. Program Mobiliti Bakat dijenamakan semula mengambil alih pelaksanaan *MyASEAN* dan *MyAPEC Youth Connect* bagi menggembeleng usaha proaktif dalam meningkatkan kebolehpasaran

SOALAN NO : 11

global bakat negara dalam mendepani gelombang revolusi industri 4.0.

2. Program ini menyediakan penempatan kerja jangka pendek dan latihan industri bersama syarikat yang berminat untuk melatih tenaga bakat Malaysia di dalam dan luar negara melalui insentif yang telah disediakan bagi membantu urusan mudahcara pelatih untuk menyempurnakan latihan industri dan penempatan pekerjaan jangka singkat bersama majikan. Antara kebaikan dan manfaat pelaksanaan program ini adalah seperti:

- i. Meningkatkan kebolehpasaran graduan tempatan dengan nilai tambah selaras dengan keperluan tenaga bakat global;
- ii. Memberi pendedahan kepada ekosistem dan pasaran global melalui program mobiliti usahasama pemain industri, universiti dan institut latihan TVET;
- iii. Meningkatkan kompetensi insaniah (*soft skills*) dan kemahiran berkomunikasi dalam persekitaran yang berbeza dan mencabar; dan
- iv. Memberi pendedahan dan meningkatkan kebijaksanaan budaya (*cultural intelligence*) para graduan dalam mendepani persekitaran kerja yang lebih kompetitif dan global.

Tuan Yang di-Pertua,

3. Sehingga September 2019, sejumlah 458 bakat muda negara telah menyertai dan mendapat manfaat menerusi program mobiliti bakat dengan penyertaan dan sokongan lebih 30 kementerian, agensi dan pemain industri negara antaranya MITI, Panasonic, BDO, Maybank Berhad, CIMB, AirAsia, Sime Darby, KPMG, UEM, Axiata, INTEL, IBM, dan banyak lagi.

Tuan Yang Di Pertua,

4. Menyedari kepentingan untuk meningkatkan kebolehpasaran graduan berteraskan *global citizenship*, dengan izin, selaras dengan keperluan industri bersaing untuk mendapatkan bakat terbaik dengan pengalaman global, TalentCorp akan memperluaskan kolaborasi strategik bersama Jabatan Tenaga Manusia (JTM), Kementerian Sumber Manusia dan Jabatan Pengajian Tinggi (JPT), Kementerian Pendidikan Malaysia untuk memperluas pelaksanaan mobiliti bakat ini di universiti dan institut latihan awam tempatan. Inisiatif ini akan diperhalusi untuk ditingkatkan skala pelaksanaannya kepada program yang lebih berimpak tinggi khususnya dalam menyediakan graduan dan takungan bakat negara yang selaras dengan permintaan industri global.

5. Program mobiliti bakat ini juga kini tidak terhad kepada penempatan pekerjaan singkat dan latihan industri malah akan diperluaskan kepada program pertukaran bakat, pendedahan sosio dan antara budaya serta projek kolaborasi bersama industri di bawah peruntukan pelaksanaan mobiliti bakat. Program mobiliti bakat ini juga akan dijayakan dengan usaha sama pemegang taruh strategik seperti MOHR, MOE, MITI, pihak industri dan institusi pengajian tinggi awam dan institut latihan teknikal negara.

PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS

PERTANYAAN : LISAN

**DARIPADA : TUAN HAJI WAN HASSAN BIN MOHD RAMLI
[DUNGUN]**

TARIKH : 13 NOVEMBER 2019 (RABU)

SOALAN NO. 12

Minta **MENTERI HAL EHWAL EKONOMI** menyatakan apakah langkah Kerajaan dalam merapatkan jurang antara negeri-negeri kaya dan miskin serta pendapatan penduduk luar bandar dan bandar sepertimana yang dirangka di dalam Dasar Kemakmuran Bersama.

JAWAPAN

Tuan Yang di-Pertua,

1. Untuk makluman Yang Berhormat, tumpuan Kerajaan adalah ke arah memastikan pembangunan yang seimbang dilaksanakan merentasi wilayah dan negeri. Ia adalah penting bagi memastikan supaya setiap lapisan masyarakat dapat menikmati pembangunan yang adil dan saksama serta kesejahteraan semua rakyat terjamin berdasarkan konsep Kemakmuran Bersama atau "*shared prosperity*".
2. Wawasan Kemakmuran Bersama 2030 (WKB) merupakan agenda nasional yang akan memandu hala tuju negara secara lebih holistik bagi tempoh 2021-2030. WKB merupakan iltizam Kerajaan untuk menjadikan Malaysia sebagai sebuah negara yang akan terus membangun secara mampan dengan pengagihan ekonomi yang adil dan saksama, inklusif merentasi kumpulan pendapatan, etnik, wilayah dan rantai bekalan.

Pelaksanaan WKB akan diterjemahkan untuk tempoh 10 tahun dalam Rancangan Malaysia Ke-12 dan Rancangan Malaysia Ke-13.

3. Matlamat WKB adalah untuk menyediakan taraf hidup yang wajar (*decent standard of living*) kepada semua rakyat Malaysia menjelang tahun 2030 dengan memberikan fokus kepada usaha untuk menangani jurang kekayaan dan pendapatan, merentasi wilayah termasuk negeri-negeri serta penduduk luar bandar dan bandar. Ini adalah penting supaya negeri-negeri kurang membangun dan golongan penduduk yang ketinggalan dapat dibawa bersama dalam arus kemajuan negara, nasib mereka terbela dan keupayaan ekonomi mereka diperkasakan.

Tuan Yang di-Pertua,

4. Objektif kedua dalam WKB, iaitu Menangani Jurang Kekayaan dan Pendapatan menumpukan usaha untuk merapatkan jurang ekonomi di antara kelas pendapatan, etnik, wilayah dan rantai bekalan. Bagi menangani jurang ekonomi antara kumpulan pendapatan, tumpuan Kerajaan adalah untuk mewujudkan aktiviti ekonomi bernilai tinggi dan pekerjaan berpendapatan tinggi yang menyumbang kepada usaha untuk merapatkan jurang ekonomi di antara kumpulan pendapatan.

5. Dalam konteks jurang antara wilayah termasuk negeri-negeri serta kawasan bandar dan luar bandar, Kerajaan menyedari bahawa jurang pengagihan ekonomi bagi kawasan tersebut semakin melebar. Justeru, di bawah Teras Strategik Keenam WKB, iaitu Keterangkuman Wilayah, pemetaan kawasan titik panas ekonomi (*economic hot spots*), dengan izin, akan dilaksanakan bagi mengenalpasti kawasan-kawasan yang berpotensi sebagai pusat aktiviti ekonomi yang mampan. Pemilihan strategi bagi setiap lokasi yang ditetapkan adalah berasaskan kepada kekuatan dan keunikan di kawasan tersebut. Dalam Teras Strategik Kedua, terdapat 15 cadangan Aktiviti Pertumbuhan Ekonomi Utama (KEGA) yang dikenalpasti. Antaranya ialah Ekonomi Digital dan Pertanian Pintar untuk mengembangkan dan merancakkan lagi aktiviti ekonomi merentasi wilayah dan negeri-negeri.

Tuan Yang di-Pertua,

6. Kerajaan yakin dan percaya bahawa usaha Kerajaan untuk merapatkan jurang pembangunan merentasi wilayah dan negeri serta penduduk luar bandar dan bandar akan tercapai melalui pelaksanaan WKB ini. Dasar dan strategi serta pelan tindakan berkaitan sedang giat dirangka oleh Kementerian Hal Ehwal Ekonomi dan akan dibentangkan dalam Rancangan Malaysia Kedua Belas (RMKe-12) pada tahun hadapan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATIN PADUKA DR. TAN YEE KEW
(WANGSA MAJU)**

TARIKH : 13 NOVEMBER 2019 (RABU)

SOALAN

minta **PERDANA MENTERI** menyatakan apakah tindakan Kerajaan untuk menangani budaya ekstremisme yang telah dipromosi oleh kumpulan-kumpulan tertentu sehingga membawa kepada gejala negatif seperti stereotaip, prejudis, perkauman dan diskriminasi yang menebal dalam kalangan masyarakat.

**JAWAPAN : YB SENATOR TUAN WAYTHA MOORTHY A/L
PONNUSAMY, MENTERI DI JABATAN PERDANA
MENTERI (PERPADUAN NEGARA DAN
KESEJAHTERAAN SOSIAL)**

Yang di-Pertua,

Kepelbagaian agama, etnik dan budaya akan terus menjadi teras kepada kekuatan Malaysia untuk menjadi sebuah negara maju. Perpaduan jitu yang dibentuk oleh rakyat negara ini adalah asas kepada pengukuhan Malaysia sebagai sebuah negara aman dan harmoni.

Sungguhpun begitu, perpaduan yang jitu ini jika tidak diurus dan dipelihara dengan baik boleh menyebabkan negara berada dalam suasana genting dan huru hara memandangkan masyarakat Malaysia terdiri dari pelbagai latar belakang keturunan, agama, budaya dan bahasa.

Justeru itu, beberapa langkah dan tindakan perlu diambil dan dikekalkan dalam usaha memastikan rakyat di Malaysia ini terus bersatu padu dan di antaranya adalah seperti berikut:

- (i) Menghormati dan memelihara kepelbagaian agama, budaya dan adat resam sesuatu kaum. Setiap individu berhak mengamalkan adat resam kaum masing-masing dengan harmoni. Sewajarnya sikap saling menghormati dan memahami budaya sesama kaum ini perlu dipertahankan demi kesinambungan perpaduan negara;
- (ii) Mencipta detik-detik perpaduan melalui pelbagai kegiatan dan aktiviti yang melibatkan masyarakat pelbagai kaum dengan penglibatan dan penyertaan semua pihak termasuk badan-badan korporat, badan bukan kerajaan (NGO), organisasi masyarakat sivil (CSO) dan pihak swasta;
- (iii) Mengambil tindakan tegas dan pantas oleh pihak penguatkuasa ke atas kesalahan pelaku di bawah undang-undang yang sedang berkuatkuasa bagi mencegah budaya ekstremisme; dan
- (iv) Mendidik masyarakat untuk memahami dan menghormati undang-undang. Kegagalan rakyat untuk menghormati undang-undang akan menggugat keharmonian negara memandangkan masyarakat tidak lagi saling menghormati antara satu sama lain sehingga boleh mengakibatkan sikap stereotaip, prejudis dan perkauman yang menebal.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SERI HAJI AHMAD BIN HAMZAH
[JASIN]**

TARIKH : 13 NOVEMBER 2019 (RABU)

SOALAN NO. 14

Minta **MENTERI HAL EHWAL EKONOMI** menyatakan penunjuk aras yang tepat berhubung tahap kemiskinan di negara ini ekoran wujudnya percanggahan formula yang diguna pakai oleh Kerajaan dan pakar asasi hak manusia Pertubuhan Bangsa-Bangsa Bersatu (PBB) baru-baru ini.

JAWAPAN

Tuan Yang di-Pertua,

1. Sepertimana ahli Yang Berhormat sedia maklum, Yang Amat Berhormat Perdana Menteri telah menjawab mengenai isu kemiskinan di Malaysia di Dewan yang mulia ini pada 7 Oktober 2019 yang lalu.
2. Laporan End of Mission Statements oleh Pelapor Khas Pertubuhan Bangsa-Bangsa Bersatu (PBB), Profesor Philip Alston telah mengundang pelbagai reaksi dalam kalangan masyarakat. Kerajaan mengambil maklum laporan tersebut namun perlu dijelaskan di sini bahawa kadar kemiskinan rasmi di Malaysia dikira berdasarkan cerapan data Penyiasatan Pendapatan Isi Rumah (HIS – Household Income Survey) yang selaras dengan piawaian antarabangsa. Kementerian Hal Ehwal Ekonomi (MEA) telah meneliti laporan tersebut dan mendapati beberapa komen dan kenyataan beliau berikan tidak tepat. Metodologi penyiasatan beliau juga tidak menggunakan kaedah kajian secara saintifik dan empirikal.

3. Dalam mengukur kemiskinan mutlak di Malaysia, Kerajaan mengguna pakai Pendapatan Garis Kemiskinan (PGK). PGK merupakan pendapatan minimum yang diperlukan oleh sesebuah isi rumah bagi memenuhi keperluan asas makanan dan bukan makanan setiap ahlinya untuk membolehkan mereka hidup dalam keadaan sihat dan aktif. Kaedah ini mengambil kira ciri-ciri demografi isi rumah iaitu saiz ahli isi rumah, umur, jantina dan lokasi isi rumah (wilayah, negeri, bandar atau luar bandar).
4. PGK pada keseluruhannya merangkumi PGK makanan dan PGK bukan makanan. Penentuan keperluan PGK makanan adalah berasaskan kepada keperluan minimum tenaga atau kalori bagi setiap ahli isi rumah yang mengambil kira piramid makanan dan amalan pemakanan seimbang. PGK bukan makanan pula ditentukan oleh perbelanjaan sebenar berasaskan pola perbelanjaan isi rumah berpendapatan rendah di Malaysia yang merangkumi perbelanjaan pakaian, perumahan, pengangkutan dan keperluan-keperluan bukan makanan lain.
5. Sesebuah isi rumah dikategori sebagai miskin tegar sekiranya pendapatan bulannya kurang daripada PGK makanan. Manakala, sesebuah isi rumah dikategori sebagai miskin sekiranya pendapatan bulanan mereka kurang daripada PGK keseluruhan (PGK makanan dan PGK bukan makanan).
6. Sumber data utama yang digunakan untuk menentukan nilai PGK Malaysia adalah Penyiasatan Pendapatan Isi Rumah dan Kemudahan Asas (PPIR&KA), Penyiasatan Perbelanjaan Isi Rumah (HES) dan data harga daripada Indeks Harga Pengguna oleh Jabatan Perangkaan Malaysia (DOSM).
7. PPIR&KA adalah berdasarkan *Canberra Group Handbook on Household Income Statistics, Second Edition* (2011) yang diterbitkan oleh *United Nations* dan diterima pakai di peringkat antarabangsa. PPIR&KA melibatkan persampelan lebih kurang 88 ribu isi rumah dari 6.97 juta isi rumah di Malaysia.

8. Untuk makluman ahli Yang Berhormat, berdasarkan PPIR&KA pada tahun 2016, PGK keseluruhan di peringkat nasional adalah RM980 dan berdasarkan PGK tersebut, insiden kemiskinan mutlak di Malaysia adalah 0.4 peratus melibatkan 24,700 isi rumah.

9. Bagi menambah baik model PGK sedia ada, Kerajaan sebenarnya telahpun memulakan kajian semula PGK sejak bulan Mac 2019. Pelaksanaan kajian semula ini sedang giat dijalankan dengan kerjasama Jabatan Perangkaan Malaysia, Kementerian Kesihatan Malaysia serta jabatan-jabatan dan agensi-agensi berkaitan.

10. Sementara itu, bagi pengukuran kemiskinan yang lebih inklusif selaras dengan amalan antarabangsa, Indeks Kemiskinan Pelbagai Dimensi (MPI) juga telah diperkenal dalam Kajian Separuh Penggal Rancangan Malaysia Kesebelas (KSP RMKe-11). MPI mengukur dan memantau kemiskinan dalam perspektif pelbagai dimensi merangkumi kesihatan, pendidikan, taraf hidup (*living standard*) dan pendapatan.

11. Sehubungan ini, Kementerian Hal Ehwal Ekonomi akan meneruskan libat urus dengan pemegang taruh berkaitan pelaksanaan MPI dalam perancangan dan penggubalan dasar, strategi serta inisiatif ke arah pembasmian kemiskinan yang lebih komprehensif dan berkesan bermula pada Rancangan Malaysia Kedua Belas (RMKe-12) berdasarkan semangat Wawasan Kemakmuran Bersama 2030.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : YB DATUK DR. HASAN BIN BAHROM
[TAMPIN]**

TARIKH : 13 NOVEMBER 2019 (RABU)

SOALAN

Minta **PERDANA MENTERI** menyatakan adakah Kementerian telah bersiap sedia dalam menghadapi serangan siber terhadap Malaysia, kerana pada era sekarang, keganasan siber boleh memberikan kesan yang buruk kepada imej dan pembangunan negara jika kita tidak bersedia menghadapinya. Dan apakah usaha-usaha Kementerian dalam memberi keyakinan kepada rakyat dalam kesiap siagaan negara terhadap apa-apa bentuk serangan siber sekalipun.

JAWAPAN

Tuan Yang Di-Pertua,

1. Kerajaan telah mengambil langkah proaktif dan perlindungan kepada agensi-agensi Infrastruktur Maklumat Kritikal Negara (*Critical National Information Infrastructure* (CNII)) daripada ancaman dan serangan siber melalui inisiatif di bawah Dasar Keselamatan Siber Negara (*National Cyber Security Policy* (NCSP)) dan Pelan Pengurusan Krisis Siber Negara (*National Cyber Crisis Management Plan* (NCCMP)).

2. Pelan ini dibangunkan berdasarkan rangka kerja pengurusan risiko dan telah diterjemahkan ke dalam dua (2) dokumen iaitu **Arahan Majlis Keselamatan Negara (MKN) No. 24 : Dasar dan Mekanisme Pengurusan Krisis Siber Negara** dan **Prosedur Tindakbalas Komunikasi dan Penyelarasan Krisis Siber Negara**.

3. Antara program kesiapsiagaan yang dilaksanakan sejak tahun 2008 adalah Latih Amal Krisis Siber Negara (X-Maya) yang bertujuan untuk menguji dan membiasakan agensi CNII dengan mekanisme pengendalian insiden siber dan meningkatkan tahap keupayaan serta kesediaan agensi bagi menghadapi sebarang ancaman siber. Pada tahun ini, NACSA dengan kerjasama pihak International Telecommunication Union (ITU) dan Kementerian Komunikasi dan Multimedia Malaysia telah menganjurkan Latih Amal Siber di peringkat Asia Pacific dan Commonwealth of Independent States (CIS) pada 23-27 September 2019 untuk menguji tahap kemampuan pengendali-pengendali insiden keselamatan siber di rantau ini.

4. Bagi melaksanakan pemantauan tahap keselamatan siber negara, Kerajaan telah membangunkan *National Cyber Coordination and Command Centre* (NC4) yang menghubungkan agensi-agensi kritikal negara dan pusat-pusat pemantauan siber yang dikenalpasti.

5. Selain itu, Kerajaan juga telah menetapkan keperluan dan baseline keselamatan siber yang perlu kepada agensi-agensi CNII melalui pelaksanaan Pensijilan MS ISO/IEC 27001 Sistem Pengurusan Keselamatan Maklumat (*Information Security Management System* (ISMS)) untuk agensi-agensi CNII melalui keputusan Jemaah Menteri pada 24 Februari 2010. Pensijilan ini menetapkan keperluan pematuhan melalui satu pendekatan yang sistematik dalam pengurusan maklumat bagi menjamin keselamatan maklumat termasuk polisi, proses, prosedur dan fungsi perkakasan serta perisian berkaitan. Seperti juga pensijilan MS ISO yang lain, agensi-agensi CNII yang telah mendapat pensijilan tersebut perlu melalui pengauditan semula setiap dua (2) hingga (3) tahun bagi mengekalkan pensijilan tersebut.

SOALAN NO : 15

6. Kerajaan juga akan melaksanakan usaha agresif memantau dan mengambil tindakan proaktif bagi mengukuhkan infrastruktur ICT negara berdasarkan pelan tindakan Strategi Keselamatan Siber Negara (2020-2024) yang akan dilancarkan kelak.

7. Selain itu, kerajaan melalui Agensi Keselamatan Siber Negara (NACSA) telah dan sedang mengambil inisiatif meningkatkan sesi libat urus bersama rakyat untuk meningkatkan kesedaran rakyat terhadap ancaman keselamatan siber. Dalam sesi ini, NACSA berkongsi dengan masyarakat terhadap inisiatif-inisiatif yang telah dan sedang dilaksanakan oleh Kerajaan sebagai usaha untuk meningkatkan keyakinan kepada rakyat dalam kesiapsiagaan negara terhadap apa-apa bentuk serangan siber.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJI TAJUDDIN BIN ABDUL
RAHMAN [PASIR SALAK]**

TARIKH : 13 NOVEMBER 2019 (RABU)

SOALAN NO. 16

Minta **MENTERI HAL EHWAL EKONOMI** menyatakan:-

- (a) Langkah-langkah yang telah diambil dan kejayaan dalam mewujudkan aktiviti-aktiviti sampingan kepada warga FELCRA bagi tujuan menambah pendapatan mereka; dan
- (b) Berapakah bilangan rumah generasi kedua FELCRA yang baru yang telah dilaksanakan oleh Kerajaan sepanjang tahun 2018 dan 2019.

JAWAPAN

Tuan Yang di-Pertua,

1. Untuk makluman Ahli Yang Berhormat, Pengurusan FELCRA Berhad sejak dikorporatkan pada 1 September 1997 sehingga kini telah memperuntukkan hampir RM95 juta untuk mewujudkan pelbagai program dan aktiviti sampingan bagi memantapkan kualiti hidup komuniti peserta FELCRA Berhad di seluruh negara.

2. Perlaksanaan program aktiviti sampingan untuk meningkatkan pendapatan warga peserta adalah menerusi program sosioekonomi secara individu atau berkelompok serta melibatkan institusi seperti Koperasi Peserta Rancangan (KPR), Wanita Dinamis FELCRA (WADIRA) dan Belia (Pertubuhan Belia).

3. Menerusi platform ini, pelbagai bidang perniagaan telah diusahakan dalam sektor pelancongan, peruncitan, mekanisasi ladang, pembuatan, pengangkutan dan pembinaan di samping penglibatan dalam pengeluaran produk hiliran berasaskan pertanian, akuakultur dan ternakan. Keuntungan yang diperoleh daripada institusi berkenaan dapat disalurkan semula kepada peserta untuk memantapkan sosioekonomi keluarga dan juga membiayai program-program kesejahteraan dan kebajikan komuniti peserta setempat. Antara contoh kejayaan KPR dalam bidang perniagaan adalah dalam perniagaan stesyen minyak (7 buah) dan perniagaan kedai runcit (11 buah). WADIRA terlibat dalam perniagaan seperti salon dan spa muslimah, perusahaan kek dan pastri, ternakan madu kelulut, jahitan dan sulaman dan pengurusan inap desa (*homestay*) yang berjaya menjana pendapatan antara RM1000 hingga RM4500 sebulan.

4. Bagi projek perumahan pula, sepanjang tahun 2018 dan 2019, Pengurusan FELCRA Berhad komited untuk menyiapkan sebanyak 973 unit rumah di bawah Projek Perumahan Generasi Kedua seperti berikut:

- a. 140 unit rumah di FELCRA Sri Makmur, Daerah Pekan, Pahang (100% siap);
- b. 123 unit rumah di FELCRA Sukau, Daerah Kinabatangan, Sabah (60% siap); dan
- c. 710 unit rumah di FELCRA Seberang Perak, Daerah Kampung Gajah, Perak (90% siap) .

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KE-EMPAT BELAS**

PERTANYAAN : LISAN

**DARIPADA : TUAN PRABAKARAN A/L M
PARAMESWARAN (BATU)**

TARIKH : 13 NOVEMBER 2019 (RABU)

SOALAN NO. 17

Minta **MENTERI PENGANGKUTAN** menyatakan bagaimana Kementerian ingin memastikan pengangkutan awam seperti Bas Rapid KL memberi perkhidmatan mengikut jadual yang ditetapkan memandangkan perkhidmatan Bas Rapid KL selalu tiba lewat dan kelewatan tersebut berpunca daripada beberapa faktor lain selain kesesakan lalu lintas. Adakah Kementerian melihat bahawa permasalahan ini bukan sahaja menyusahkan pengguna malahan ianya membawa kepada kerugian kepada syarikat dan adakah Kementerian juga melihat bahawa perkara ini berlaku oleh kerana sistem monopoli yang berlaku di kawasan-kawasan tertentu terutamanya di kawasan Bandaraya Kuala Lumpur.

JAWAPAN

Yang di-Pertua,

1. Untuk makluman Yang Berhormat, perkhidmatan pengangkutan awam seperti perkhidmatan Bas Rapid KL adalah amat terdedah kepada elemen-elemen luar kawalan terutamanya faktor kesesakan lalulintas yang teruk di dalam kawasan Lembah Kelang ini. Dalam hubungan ini, Kementerian Pengangkutan menyedari bahawa satu perkhidmatan pengangkutan awam yang berkesan tidak dapat disediakan selagi mana faktor-faktor luar kawalan ini tidak ditangani secara menyeluruh, bersepadu dan secara efisien.

2. Oleh yang demikian, Kementerian Pengangkutan akan mengadakan perbincangan dengan terperinci dengan semua pihak-pihak yang berkepentingan seperti Pihak Berkuasa Tempatan dan juga Kementerian Kerja Raya bagi mengenalpasti kaedah-kaedah bersesuaian bagi menangani isu ini. Antara kaedah yang dikenalpasti adalah dengan menyediakan laluan-laluan khas untuk bas (di mana bersesuaian) serta memberi keutamaan kepada bas di persimpangan-persimpangan lampu lalulintas (*traffic lights*). Kaedah-kaedah akan berupaya memastikan perkhidmatan bas dapat mempunyai keutamaan dan laluan khas dan tidak terganggu dengan kesesakan lalulintas.

3. Selain itu, aplikasi mudah alih perancang perjalanan akan juga diwujudkan untuk memudahkan pengguna mengetahui ketibaan sebenar bas. Penggunaan teknologi ini akan membolehkan pengguna mengetahui maklumat pergerakan, ketibaan dan pelepasan bas seterusnya memudahkan pengguna untuk merancang perjalanan mereka. Prasarana juga akan memastikan pengambilan pemandu dijalankan dengan lebih kerap bagi mengatasi masalah kekurangan pemandu yang mengakibatkan kekurangan perkhidmatan operasi bas.

4. Semua tindakan yang telah dan akan diambil ini akan berupaya menjadikan perkhidmatan pengangkutan awam terutamanya perkhidmatan bas menjadi lebih baik, mesra pelanggan serta memenuhi keperluan semua lapisan pengguna.

5. Mengenai persoalan sama ada isu tahap perkhidmatan ini berkaitan dengan isu monopoli, ingin saya tekankan di sini bahawa isu kelewatan atau tahap perkhidmatan ini disumbang oleh faktor-faktor luaran seperti kesesakan lalu lintas, pelan perancangan pembangunan guna tanah yang tidak mengambil kira keperluan pengangkutan di dalamnya serta isu perkhidmatan seperti kekurangan pemandu dan berkaitannya.

6. Perlu juga diambil kira bahawa penyediaan perkhidmatan bas memerlukan satu pelaburan awal dan kos pengoperasian yang amat tinggi. Berdasarkan kepada kos pelaburan dan pengoperasian yang tinggi ini, maka pengusaha-pengusaha bas memerlukan jumlah penumpang yang tinggi dan laluan-laluan yang bersesuaian semata-mata untuk *break even* dan terus berupaya untuk beroperasi. Oleh yang demikian, Kerajaan terpaksa mengawal jumlah penyedia perkhidmatan di dalam satu-satu kawasan bagi memastikan tahap kelestarian penyedia perkhidmatan itu sendiri. Jika terlalu banyak penyedia perkhidmatan yang beroperasi dalam satu laluan, ianya akan menyumbang kepada berlakunya persaingan yang tidak sihat, seperti perkhidmatan bas tidak mengikut laluan, perkhidmatan tidak mengikut jadual yang ditetapkan, pengusaha berebut mendapatkan penumpang, hanya memilih beroperasi pada waktu mempunyai penumpang serta menunggu bas hingga penuh sebelum memulakan perjalanan (seperti mana yang pernah kita alami dalam tahun 80an dan 90an dahulu).

7. Walau bagaimanapun, adalah kurang tepat untuk mengatakan wujud keadaan monopoli untuk perkhidmatan bas di Lembah Klang kerana terdapat beberapa syarikat perkhidmatan bas lagi selain Bas Rapid KL di bawah Prasarana Malaysia. Kerajaan akan mengkaji dan melaksanakan model kontrak perkhidmatan bas (*bus contracting model*) yang lebih cekap dan menggalakan persaingan pada masa hadapan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN HASSAN BIN ABDUL KARIM
[PASIR GUDANG]**

TARIKH : 13 NOVEMBER 2019 (RABU)

SOALAN NO. 19

Minta **MENTERI HAL EHWAL EKONOMI** menyatakan apakah Laporan Pemantau Khas Krisis Kemiskinan dan Hak Kemanusiaan PBB, Prof. Philip Alston berkenaan peratus kemiskinan di Malaysia bukan 0.4% tetapi 15% itu salah.

JAWAPAN

Tuan Yang di-Pertua,

1. Sepertimana ahli Yang Berhormat sedia maklum, Yang Amat Berhormat Perdana Menteri telah menjawab mengenai isu kemiskinan di Malaysia di Dewan yang mulia ini pada 7 Oktober 2019 yang lalu.
2. Laporan End of Mission Statements oleh Pelapor Khas Pertubuhan Bangsa-Bangsa Bersatu (PBB), Profesor Philip Alston telah mengundang pelbagai reaksi dalam kalangan masyarakat. Kerajaan mengambil maklum laporan tersebut namun perlu dijelaskan di sini bahawa kadar kemiskinan rasmi di Malaysia dikira berdasarkan cerapan data Penyiasatan Pendapatan Isi Rumah (HIS – Household Income Survey) yang selaras dengan piawaian antarabangsa. Kementerian Hal Ehwal Ekonomi (MEA) telah meneliti laporan tersebut dan mendapati beberapa komen dan kenyataan beliau berikan tidak tepat. Metodologi penyiasatan beliau juga tidak menggunakan kaedah kajian secara saintifik dan empirikal.

3. Dalam mengukur kemiskinan mutlak di Malaysia, Kerajaan mengguna pakai Pendapatan Garis Kemiskinan (PGK). PGK merupakan pendapatan minimum yang diperlukan oleh sesebuah isi rumah bagi memenuhi keperluan asas makanan dan bukan makanan setiap ahlinya untuk membolehkan mereka hidup dalam keadaan sihat dan aktif. Kaedah ini mengambil kira ciri-ciri demografi isi rumah iaitu saiz ahli isi rumah, umur, jantina dan lokasi isi rumah (wilayah, negeri, bandar atau luar bandar).
4. PGK pada keseluruhannya merangkumi PGK makanan dan PGK bukan makanan. Penentuan keperluan PGK makanan adalah berasaskan kepada keperluan minimum tenaga atau kalori bagi setiap ahli isi rumah yang mengambil kira piramid makanan dan amalan pemakanan seimbang. PGK bukan makanan pula ditentukan oleh perbelanjaan sebenar berasaskan pola perbelanjaan isi rumah berpendapatan rendah di Malaysia yang merangkumi perbelanjaan pakaian, perumahan, pengangkutan dan keperluan-keperluan bukan makanan lain.
5. Sesebuah isi rumah dikategori sebagai miskin tegar sekiranya pendapatan bulannya kurang daripada PGK makanan. Manakala, sesebuah isi rumah dikategori sebagai miskin sekiranya pendapatan bulanan mereka kurang daripada PGK keseluruhan (PGK makanan dan PGK bukan makanan).
6. Sumber data utama yang digunakan untuk menentukan nilai PGK Malaysia adalah Penyiasatan Pendapatan Isi Rumah dan Kemudahan Asas (PPIR&KA), Penyiasatan Perbelanjaan Isi Rumah (HES) dan data harga daripada Indeks Harga Pengguna oleh Jabatan Perangkaan Malaysia (DOSM).
7. PPIR&KA adalah berdasarkan *Canberra Group Handbook on Household Income Statistics, Second Edition* (2011) yang diterbitkan oleh *United Nations* dan diterima pakai di peringkat antarabangsa. PPIR&KA melibatkan persampelan lebih kurang 88 ribu isi rumah dari 6.97 juta isi rumah di Malaysia.

8. Untuk makluman ahli Yang Berhormat, berdasarkan PPIR&KA pada tahun 2016, PGK keseluruhan di peringkat nasional adalah RM980 dan berdasarkan PGK tersebut, insiden kemiskinan mutlak di Malaysia adalah 0.4 peratus melibatkan 24,700 isi rumah.

9. Bagi menambah baik model PGK sedia ada, Kerajaan sebenarnya telahpun memulakan kajian semula PGK sejak bulan Mac 2019. Pelaksanaan kajian semula ini sedang giat dijalankan dengan kerjasama Jabatan Perangkaan Malaysia, Kementerian Kesihatan Malaysia serta jabatan-jabatan dan agensi-agensi berkaitan.

10. Sementara itu, bagi pengukuran kemiskinan yang lebih inklusif selaras dengan amalan antarabangsa, Indeks Kemiskinan Pelbagai Dimensi (MPI) juga telah diperkenal dalam Kajian Separuh Penggal Rancangan Malaysia Kesebelas (KSP RMKe-11). MPI mengukur dan memantau kemiskinan dalam perspektif pelbagai dimensi merangkumi kesihatan, pendidikan, taraf hidup (*living standard*) dan pendapatan.

11. Sehubungan ini, Kementerian Hal Ehwal Ekonomi akan meneruskan libat urus dengan pemegang taruh berkaitan pelaksanaan MPI dalam perancangan dan penggubalan dasar, strategi serta inisiatif ke arah pembasmian kemiskinan yang lebih komprehensif dan berkesan bermula pada Rancangan Malaysia Kedua Belas (RMKe-12) berdasarkan semangat Wawasan Kemakmuran Bersama 2030.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHANG LIH KANG [TANJONG MALIM]

TARIKH : 13 NOVEMBER 2019 [KHAMIS]

SOALAN

Minta **MENTERI HAL EHWAL EKONOMI** menyatakan menjelaskan kedudukan kewangan semasa FELDA dan FELDA Technoplant Sdn Bhd (FTP).

JAWAPAN

Tuan Yang di-Pertua,

1. Untuk makluman Ahli Yang Berhormat, kedudukan kewangan dan operasi FELDA semakin pulih dengan penambahbaikan berterusan melalui pelaksanaan inisiatif Kertas Putih FELDA. Kerajaan telah memulakan langkah proaktif dengan menyalurkan peruntukan secara berperingkat kepada FELDA untuk memulihkan kedudukan kewangan dan operasi FELDA serta menjamin kebajikan peneroka.
2. Kedudukan kewangan dan operasi FELDA bertambah baik dengan pengurusan dalam yang cekap. Penyata Kewangan FELDA pada 30 Jun 2019 yang belum diaudit mencatatkan kerugian bersih selepas cukai sebanyak RM260.37 juta berbanding RM660.79 juta pada Jun 2018. Di samping itu, jumlah baki tunai FELDA adalah sebanyak RM214.48 juta berbanding RM92.44 juta pada Jun 2018.

Tuan Yang di-Pertua,

3. FELDA Technoplant Sdn Bhd (FTPSB) merupakan agen pengurusan tanam semula yang bertanggungjawab mengurus operasi tanam semula sawit dan getah bagi kebun milik peneroka yang bersama FELDA. Oleh yang demikian, kedudukan kewangan FTPSB adalah berkait secara langsung dengan kedudukan kewangan semasa FELDA.

4. Penyata Kewangan FTPSB pada 30 Ogos 2019 yang belum diaudit mencatatkan keuntungan sebanyak RM140 ribu berbanding RM122 ribu pada 30 Ogos 2018. Selain itu, penyata yang sama menunjukkan jumlah baki tunai di tangan adalah sebanyak RM2.6 juta berbanding RM167 ribu pada tempoh yang sama bagi tahun sebelumnya. Secara keseluruhan, kedudukan kewangan dan operasi FTPSB dijangka bertambah baik seiring dengan pelaksanaan strategi yang digariskan dalam Kertas Putih FELDA.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KETIGA, PENGGAL KEDUA, PARLIMEN KE-14
(DEWAN RAKYAT)

PERTANYAAN : LISAN

**DARIPADA : DATO' SYED ABU HUSSIN BIN HAFIZ SYED
ABDUL FASAL [BUKIT GANTANG]**

TARIKH : 13 NOV 2019 (RABU)

SOALAN

DATO' SYED ABU HUSSIN BIN HAFIZ SYED ABDUL FASAL [BUKIT GANTANG] minta **MENTERI INDUSTRI UTAMA** menyatakan apakah langkah penggantian yang sewajarnya diambil Kerajaan terhadap pembatalan skim Tanam Semula Sawit Pekebun Kecil (TSSPK). Pembatalan ini, menjejaskan 650,000 pekebun kecil bagi tanaman kelapa sawit seluruh negara termasuk di Parlimen Bukit Gantang yang sumber hasilnya tidak memberansangkan dan pada masa yang sama harga komoditi yang jatuh dan tidak stabil.

JAWAPAN

Tuan Yang Di-Pertua,

Kerajaan sememangnya amat prihatin dengan situasi yang dialami oleh pekebun kecil sawit bukan sahaja di Parlimen Bukit Gantang, malah kesemua pekebun kecil sawit di negara ini.

Untuk makluman, Skim Tanam Semula Sawit Pekebun Kecil (TSSPK) yang dilaksanakan sepanjang Rancangan Malaysia Kesepuluh (RMK-10) telah digantikan dengan Skim Pembiayaan Mudah Tanam Semula Pekebun Kecil Sawit (TSPKS). Skim TSPKS adalah merupakan program yang dirancang secara teliti berdasarkan formulasi yang terbaik mengikut acuan situasi ekonomi semasa negara. Skim ini juga dirangka mengikut keperluan terkini para pekebun kecil sawit persendirian dalam melaksanakan aktiviti penanaman semula. Skim ini adalah terbuka

SOALAN NO : 22

kepada mereka yang mempunyai pokok sawit berumur melebihi 25 tahun dan ke atas dengan had maksimum pembiayaan seluas 6.5 hektar. Kerajaan telah merangka agar skim TSPKS ini tidak membebankan para pekebun kecil sawit dengan kadar faedah yang cukup rendah, tempoh moratorium selama 48 bulan, tiada cagaran dan tiada penjamin.

Untuk makluman ahli Yang Berhormat juga, skim pembiayaan TSPKS ini juga adalah selari dengan apa yang sedang dinikmati oleh para pekebun kecil tersusun di bawah rancangan FELDA yang diberi dalam bentuk pinjaman untuk program tanaman semula sawit.

Dengan purata harga bulanan minyak sawit mentah yang kembali meningkat iaitu RM1,946 pada Mei 2019 kepada RM2,280 pada 31 Oktober 2019, kesan pendapatan kepada para pekebun kecil sawit juga dijangka akan kembali pulih.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT, MESYUARAT KETIGA, PENGKAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN LIM KIT SIANG [ISKANDAR PUTERI]

TARIKH : 13 NOVEMBER 2019

SOALAN

Minta **PERDANA MENTERI** menyatakan peratusan isi rumah yang berada di bawah pendapatan garis kemiskinan di kawasan petempatan Orang Asli.

JAWAPAN : YB SENATOR TUAN WAYTHA MOORTHY A/L PONNUSAMY, MENTERI DI JABATAN PERDANA MENTERI

Tuan Yang di-Pertua,

Untuk makluman Yang Berhormat, berdasarkan Banci Orang Asli tahun 2010 peratusan isi rumah yang berada di bawah pendapatan garis kemiskinan di kawasan petempatan Orang Asli adalah sebanyak 31.16% atau 11,423 Ketua Isi Rumah (KIR).

Kementerian ini melalui Jabatan Kemajuan Orang Asli (JAKOA) sentiasa komited dalam usaha untuk menaiktaraf kehidupan masyarakat Orang Asli agar keluar dari belenggu kemiskinan.

Sehubungan itu, Kementerian ini melalui JAKOA telah menyediakan satu Pelan Strategik Jabatan Kemajuan Orang Asli (PESKOA) bagi Tahun 2016 – 2020, yang merupakan blue print sebagai asas rujukan kepada warga kerja JAKOA dalam tempoh lima tahun. PESKOA ini merupakan pelan pembangunan komprehensif yang mendokong aspirasi untuk melonjakkan pembangunan sosioekonomi dan kemajuan Orang Asli agar setanding dengan masyarakat arus perdana.

Bagi melaksanakan pembangunan secara inklusif PESKOA ini menggariskan tujuh (7) fokus yang meliputi aspek Pentadbiran Tanah, Kemudahan Prasarana, Modal Insan dan Kemahiran Belia, Ekonomi Mampan, Seni, Budaya dan Warisan, Jaringan Keselamatan (Kebajikan) dan Sistem Penyampaian Perkhidmatan. Fokus-fokus tersebut disokong oleh 7 teras strategik dan 45 program yang disasarkan, dengan menggunakan peruntukan kewangan yang diluluskan oleh kerajaan dari masa ke semasa.

Untuk makluman Yang Berhormat dalam usaha untuk mengeluarkan masyarakat Orang Asli dari garis kemiskinan, PESKOA 2016-2020 terus memberi fokus terhadap Projek Tanaman Komersial getah dan sawit agar terus diperkasakan. Sehingga kini Jabatan Kemajuan Orang Asli dengan kerjasama Pihak Berkuasa Kemajuan Pekebun Kecil Perusahaan Getah (RISDA) dan Lembaga Penyatuan dan Pemulihan Tanah Persekutuan (FELCRA) telah melaksanakan 158 projek Tanaman Semula Komersial dengan keluasan 27,404.33 hektar. Projek tersebut telah memberi faedah kepada 8,817 peserta Orang Asli dengan nilai dividen sebanyak RM400 hingga RM1,000 sebulan bergantung kepada keluasan lading, bilangan peserta, prestasi ladang dan harga komoditi semasa. Matlamat akhir JAKOA adalah untuk menyerahkan ladang-ladang tersebut kepada peserta melalui koperasi Orang Asli. Selain itu juga, JAKOA turut melaksanakan Projek Ladang Masyarakat Orang Asli (PLMOA) yang diusahakan oleh masyarakat Orang Asli itu sendiri, manakala bantuan input pertanian disediakan oleh JAKOA. Sehingga 31 Disember 2017, terdapat sebanyak 48 buah ladang dengan jumlah keluasan 2,832.92 hektar yang melibatkan 2,393 peserta Orang Asli.

Selain itu, pembangunan usahawan Orang Asli turut diberi keutamaan bagi melahirkan masyarakat Orang Asli yang mampu berdikari dan berdaya saing dalam melonjakkan ekonomi dan pendapatan sejajar dengan matlamat untuk melahirkan 600 usahawan Orang Asli dalam tempoh RMKe-11. Sehingga 31 Disember 2017, seramai 677 orang usahawan telah dibangunkan dan menerima bantuan yang disalurkan oleh JAKOA seperti premis perniagaan, peralatan perniagaan, kursus dan latihan keusahawanan dan koperasi.

Pelbagai program Kerajaan dilaksanakan melalui JAKOA serta KKLW antaranya seperti Program Bantuan Rumah (PBR), bantuan persekolahan pelajar secara percuma, pemberian biasiswa penuh kepada semua pelajar Orang Asli yang menuntut di Institusi Pengajian Tinggi Awam dalam dan luar negara, pemberian bantuan geran usahawan Orang Asli dan kemudahan perubatan percuma dan serta bantuan peralatan perubatan di semua Hospital Kerajaan.

Pada masa ini, kualiti hidup masyarakat orang asli semakin baik berbanding dahulu. Semakin ramai pelajar orang asli yang menyambung pendidikan sehingga ke peringkat universiti sama ada di dalam atau di luar negara. Selain daripada itu juga, berdasarkan kepada program-program yang dirangka oleh JAKOA, kadar keciciran pelajar orang asli di peringkat sekolah rendah serta sekolah menengah juga dilihat menunjukkan penurunan yang memberangsangkan.

Selain daripada itu juga, Kementerian ini melalui JAKOA turut menyediakan bantuan kewangan dan pengurusan bagi membolehkan masyarakat Orang Asli mengikuti kursus-kursus kemahiran asas MLVK (Sijil Kemahiran Malaysia Tahap 1 & 2) serta Sijil Profesional Khas untuk menggilap bakat serta pengetahuan dalam bidang yang diminati bagi meningkatkan daya saing dalam pasaran pekerjaan melalui Program Latihan Kemahiran dan Kerjaya (PLKK) dan berpeluang memasuki pasaran pekerjaan dengan pendapatan di antara RM1,000 hingga RM1,500 sebulan. Bermula pada tahun 2011 hingga 2017, JAKOA telah membelanjakan sebanyak RM35.21 juta dengan melibatkan 4,332 pelatih Orang Asli.

Kerajaan juga turut mengiktiraf bakat semulajadi orang asli bagi berkhidmat di dalam perkhidmatan PDRM melalui Program Konstabel Polis Orang Asli (Senoi Praaq). Program ini dilaksanakan secara kerjasama strategik di antara JAKOA dan PDRM mulai tahun 2013 dan sehingga kini melibatkan pengambilan seramai 321 konstabel Orang Asli.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' TAKIYUDDIN BIN HASSAN
[KOTA BHARU]**

TARIKH : 13 NOVEMBER 2019 (RABU)

SOALAN

Minta **PERDANA MENTERI** menyatakan:

- (a) apakah perancangan Suruhanjaya Pilihan Raya (SPR) melalui Akademi Pilihan Raya (APR) dengan kerjasama Kementerian Pendidikan bagi memastikan aktiviti-aktiviti pendidikan politik kepada pengundi dapat dilaksanakan kepada setiap lapisan masyarakat terutamanya pengundi muda; dan
- (b) apakah silibus atau aktiviti pendidikan politik yang bakal dilaksanakan.

JAWAPAN : YB TUAN MOHAMED HANIPA MAIDIN,

TIMBALAN MENTERI DI JABATAN PERDANA MENTERI

Yang di-Pertua,

- (a) Untuk makluman Yang Berhormat, perbincangan di antara Suruhanjaya Pilihan Raya (SPR) dan Kementerian Pendidikan Malaysia (KPM) telah diadakan pada **8 Ogos 2019** di mana KPM telah bersetuju agar SPR melalui Akademi Pilihan Raya (APR) menjalankan Program Pendidikan Sivik di semua sekolah menengah dan meneruskan Program Pendidikan Pengundi sedia

ada. Berhubung dengan perkara ini, SPR bersama KPM telah merancang untuk menganjurkan "**Program Pendidikan Sivik - Road To School**" yang melibatkan **2,436 buah sekolah menengah di Malaysia** pada tahun 2020. Program tersebut akan melibatkan para pelajar Tingkatan 4 dan Tingkatan 6 yang dianggarkan seramai **545,000 orang**.

Sejak tahun 2017, SPR melalui APR telah giat menjalankan Program Pendidikan Pengundi yang melibatkan pelajar-pelajar Universiti Awam, Swasta, Politeknik, Kolej Komuniti, Institut Latihan Kementerian Kesihatan, Institut Pendidikan Guru dan Institusi Pendidikan MARA. Pada tahun 2019, ia telah diperluaskan ke Kolej Matrikulasi, Institut Latihan Kementerian Sumber Manusia, Institut Kemahiran Belia Negara dan Institut Kemahiran Tinggi Belia Negara. APR juga telah menjalinkan **kerjasama strategik bersama Kelab Malaysiaku di bawah Jabatan Penerangan Malaysia dan Maktab Rendah Sains Mara (MRSM) bagi menganjurkan Program Pendidikan Sivik** di kalangan pelajar sekolah menengah.

Bagi memastikan penyampaian pendidikan pengundi dan pendidikan sivik dapat diperluas kepada segenap lapisan masyarakat terutamanya belia, APR turut **bekerjasama dengan Kementerian Belia dan Sukan (KBS)** bagi menjalankan program pendidikan pengundi kepada golongan belia yang tidak berada di dalam institusi pendidikan.

Sehingga 31 Ogos 2019, SPR dengan kerjasama semua kementerian/jabatan/agensi yang terlibat telah mengadakan sebanyak **210 program** dengan bilangan peserta seramai **70,201 orang**. APR akan meneruskan program-program pendidikan pengundi ini pada masa akan datang.

- (b) Untuk makluman Ahli Yang Berhormat, pendidikan berkaitan politik **telah dan sedang dilaksanakan di sekolah-sekolah KPM sama ada secara langsung atau secara tidak langsung** melalui kurikulum dan aktiviti kokurikulum. KPM telah mengorak langkah awal dalam memastikan murid menerima pendedahan dan pendidikan mengenai asas politik dan Perlembagaan sejak di

peringkat sekolah rendah dan menengah melalui pelaksanaan mata pelajaran Sejarah dan juga Pendidikan Moral.

Manakala di **peringkat pengajian tinggi** pengetahuan berkenaan Perlembagaan, pentadbiran dan budaya politik negara diterapkan di dalam **Kursus Hubungan Etnik dan Pengajian Malaysia** yang ditawarkan di dalam mata pelajaran Pendidikan Umum (MPU) yang wajib diambil oleh semua pelajar warganegara Malaysia di institusi pendidikan tinggi. Antara komponen di dalam kursus tersebut adalah demografi etnik dan politik, perkembangan politik, kemuafakatan politik, budaya politik baharu dan dinamika politik.

Pelaksanaan kegiatan kokurikulum berunsurkan pendidikan politik ini tidak terhad kepada usaha KPM semata-mata tetapi juga melibatkan kerjasama dengan jabatan/agensi Kerajaan yang lain. Sebagai contoh, **KPM dengan kerjasama Jabatan Penerangan Malaysia** telah melaksanakan aktiviti patriotisme melalui Kelab Malaysiaku untuk melahirkan generasi muda yang mempunyai semangat patriotik memberi pendedahan kepada murid berkaitan sistem demokrasi berparlimen.

Selain itu, melalui **Kelab Rukun Negara di sekolah**, KPM turut **bekerjasama dengan Jabatan Perpaduan Negara dan Integrasi Nasional (PERPADUAN)** untuk melaksanakan pelbagai aktiviti berteraskan kepada pengamalan Rukun Negara termasuk Prinsip Ketiga Rukun Negara iaitu Keluhuran Perlembagaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN PRABAKARAN A/L M. PARAMESWARAN
(BATU)**

TARIKH : 13 NOVEMBER 2019 (RABU)

SOALAN

minta **PERDANA MENTERI** menyatakan adakah Kerajaan mempunyai perancangan untuk membentuk sebuah institusi pendidikan seperti MARA di bawah MITRA kerana saya melihat belia benar-benar memerlukan institusi pendidikan seperti ini. Apabila institusi seperti MARA mampu diwujudkan, saya yakin dan pasti akan berakhir dengan ketegangan berkaitan kuota pendidikan dan perpaduan negara akan lebih terjamin.

**JAWAPAN : YB SENATOR TUAN WAYTHA MOORTHY A/L
PONNUSAMY, MENTERI DI JABATAN PERDANA MENTERI
(PERPADUAN NEGARA DAN KESEJAHTERAAN SOSIAL)**

Tuan Yang di-Pertua,

Untuk makluman Ahli Yang Berhormat, Unit Transformasi Masyarakat India Malaysia (MITRA) iaitu salah sebuah agensi di bawah Jabatan Perdana Menteri (JPM) kini dalam pelbagai peringkat pelaksanaan untuk lebih 200 program-program pembangunan sosioekonomi masyarakat India di Malaysia. Dalam hal ini, aspek pendidikan amat dititikberatkan oleh MITRA sebagai wadah untuk meningkatkan taraf hidup masyarakat India di Malaysia secara kolektif.

Berkaitan itu, MITRA tidak mempunyai perancangan untuk membentuk sebuah institusi pendidikan seperti MARA di bawah MITRA buat masa ini. Walau bagaimanapun, cadangan Yang Berhormat ini adalah amat dialu-alukan dan pihak MITRA akan mempertimbangkannya dalam perancangan masa depan setelah keberhasilannya dikaji dari pelbagai aspek dengan melibatkan input daripada pihak-pihak yang berkepentingan.

Dalam pada itu, MITRA sedang bekerjasama dengan Kementerian Pendidikan Malaysia melalui IPTA (Institusi Pengajian Tinggi Awam), IPTS (Institusi Pengajian Tinggi Swasta), ILKA (Institut Latihan Kemahiran Awam) dan ILKS (Institut Latihan Kemahiran Swasta) dan institusi-institusi akreditasi nasional untuk pelaksanaan kursus-kursus jangka pendek yang sedikit sebanyak akan memberi implikasi positif terhadap isu-isu mengenai kuota pendidikan di kalangan pelajar-pelajar India di Malaysia.

Selain itu, MITRA juga turut bekerjasama dengan institusi-institusi pendidikan ini dan Kementerian Sumber Manusia bagi melatih belia-belia India menerusi pusat latihan industri bertauliah serta mendapat pengiktirafan seperti Sijil Kemahiran Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN RAMKARPAL SINGH A/L KARPAL
SINGH [BUKIT GELUGOR]**

TARIKH : 13 NOVEMBER 2019 (RABU)

SOALAN NO. 27

Minta **MENTERI HAL EHWAL EKONOMI** menyatakan sama ada laporan baru-baru ini oleh Pertubuhan Bangsa-Bangsa Bersatu yang melaporkan kadar kemiskinan (poverty) di Malaysia yang bercanggah dengan status kemiskinan yang dilaporkan oleh Kerajaan adalah tepat ataupun tidak.

JAWAPAN

Tuan Yang di-Pertua,

1. Sepertimana ahli Yang Berhormat sedia maklum, Yang Amat Berhormat Perdana Menteri telah menjawab mengenai isu kemiskinan di Malaysia di Dewan yang mulia ini pada 7 Oktober 2019 yang lalu.
2. Laporan End of Mission Statements oleh Pelapor Khas Pertubuhan Bangsa-Bangsa Bersatu (PBB), Profesor Philip Alston telah mengundang pelbagai reaksi dalam kalangan masyarakat. Kerajaan mengambil maklum laporan tersebut namun perlu dijelaskan di sini bahawa kadar kemiskinan rasmi di Malaysia dikira berdasarkan cerapan data Penyiasatan Pendapatan Isi Rumah (HIS – Household Income Survey) yang selaras dengan piawaian antarabangsa. Kementerian Hal Ehwat Ekonomi (MEA) telah meneliti laporan tersebut dan mendapati beberapa komen dan kenyataan beliau berikan tidak tepat. Metodologi penyiasatan beliau juga tidak menggunakan kaedah kajian secara saintifik dan empirikal.

3. Dalam mengukur kemiskinan mutlak di Malaysia, Kerajaan mengguna pakai Pendapatan Garis Kemiskinan (PGK). PGK merupakan pendapatan minimum yang diperlukan oleh sesebuah isi rumah bagi memenuhi keperluan asas makanan dan bukan makanan setiap ahlinya untuk membolehkan mereka hidup dalam keadaan sihat dan aktif. Kaedah ini mengambil kira ciri-ciri demografi isi rumah iaitu saiz ahli isi rumah, umur, jantina dan lokasi isi rumah (wilayah, negeri, bandar atau luar bandar).
4. PGK pada keseluruhannya merangkumi PGK makanan dan PGK bukan makanan. Penentuan keperluan PGK makanan adalah berasaskan kepada keperluan minimum tenaga atau kalori bagi setiap ahli isi rumah yang mengambil kira piramid makanan dan amalan pemakanan seimbang. PGK bukan makanan pula ditentukan oleh perbelanjaan sebenar berasaskan pola perbelanjaan isi rumah berpendapatan rendah di Malaysia yang merangkumi perbelanjaan pakaian, perumahan, pengangkutan dan keperluan-keperluan bukan makanan lain.
5. Sesebuah isi rumah dikategori sebagai miskin tegar sekiranya pendapatan bulannya kurang daripada PGK makanan. Manakala, sesebuah isi rumah dikategori sebagai miskin sekiranya pendapatan bulanan mereka kurang daripada PGK keseluruhan (PGK makanan dan PGK bukan makanan).
6. Sumber data utama yang digunakan untuk menentukan nilai PGK Malaysia adalah Penyiasatan Pendapatan Isi Rumah dan Kemudahan Asas (PPIR&KA), Penyiasatan Perbelanjaan Isi Rumah (HES) dan data harga daripada Indeks Harga Pengguna oleh Jabatan Perangkaan Malaysia (DOSM).
7. PPIR&KA adalah berdasarkan *Canberra Group Handbook on Household Income Statistics, Second Edition* (2011) yang diterbitkan oleh *United Nations* dan diterima pakai di peringkat antarabangsa. PPIR&KA melibatkan persampelan lebih kurang 88 ribu isi rumah dari 6.97 juta isi rumah di Malaysia.

8. Untuk makluman ahli Yang Berhormat, berdasarkan PPIR&KA pada tahun 2016, PGK keseluruhan di peringkat nasional adalah RM980 dan berdasarkan PGK tersebut, insiden kemiskinan mutlak di Malaysia adalah 0.4 peratus melibatkan 24,700 isi rumah.

9. Bagi menambah baik model PGK sedia ada, Kerajaan sebenarnya telahpun memulakan kajian semula PGK sejak bulan Mac 2019. Pelaksanaan kajian semula ini sedang giat dijalankan dengan kerjasama Jabatan Perangkaan Malaysia, Kementerian Kesihatan Malaysia serta jabatan-jabatan dan agensi-agensi berkaitan.

10. Sementara itu, bagi pengukuran kemiskinan yang lebih inklusif selaras dengan amalan antarabangsa, Indeks Kemiskinan Pelbagai Dimensi (MPI) juga telah diperkenal dalam Kajian Separuh Penggal Rancangan Malaysia Kesebelas (KSP RMKe-11). MPI mengukur dan memantau kemiskinan dalam perspektif pelbagai dimensi merangkumi kesihatan, pendidikan, taraf hidup (*living standard*) dan pendapatan.

11. Sehubungan ini, Kementerian Hal Ehwal Ekonomi akan meneruskan libat urus dengan pemegang taruh berkaitan pelaksanaan MPI dalam perancangan dan penggubalan dasar, strategi serta inisiatif ke arah pembasmian kemiskinan yang lebih komprehensif dan berkesan bermula pada Rancangan Malaysia Kedua Belas (RMKe-12) berdasarkan semangat Wawasan Kemakmuran Bersama 2030.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI HAJI ABDUL HADI BIN AWANG
[MARANG]**

TARIKH : 13 NOVEMBER 2019 (RABU)

SOALAN NO. 28

Minta **MENTERI HAL EHWAL EKONOMI** menyatakan menyatakan apakah status terkini Jambatan Pengkalan Kubor-Tak Bai dan sejauhmana kerjasama Malaysia-Thailand dalam projek ini.

JAWAPAN

Tuan Yang di-Pertua,

1. Pembangunan ekonomi rentas sempadan merupakan antara perkara utama yang sering dibincangkan di antara Kerajaan Malaysia dengan Kerajaan Thailand, terutama melalui platform Strategi Pembangunan Bersama Kawasan Sempadan (JDS) Malaysia – Thailand dan Segi Tiga Pertumbuhan Indonesia-Malaysia-Thailand (IMT-GT).

2. Untuk makluman Ahli Yang Berhormat, semasa Sidang Kemuncak Ke-12 IMT-GT di Bangkok, Thailand pada 23 Jun 2019, kedua-dua Perdana Menteri Malaysia dan Thailand telah turut membincangkan pembinaan Jambatan Kedua Menghubungkan Rantau Panjang-Sungai Golok dan Jambatan Pengkalan Kubor-Tak Bai. Pembinaan kedua-dua jambatan ini dijangka akan meningkatkan pembangunan dan aktiviti perdagangan rentas sempadan bagi kedua-dua negara. Kedua-dua projek ini juga telah disenaraikan dalam Projek Kesalinghubungan

Fizikal (PCP) IMT-GT, yang keseluruhannya mengandungi 41 projek kesalinghubungan dengan anggaran kos sebanyak AS\$47 bilion.

3. Berkaitan pembinaan jambatan tersebut, Kerajaan dalam perancangan supaya kedua-dua projek ini dilaksanakan di bawah Rancangan Malaysia Ke-12 (2021-2025). Satu Jawatankuasa Teknikal telah turut ditubuhkan bagi membincangkan perkara-perkara teknikal berkaitan kedua-dua jambatan ini. Jawatankuasa ini dianggotai oleh Kementerian Kerja Raya (KKR) dan *Department of Highways* (DOH) Thailand.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN RAMKARPAL SINGH A/L KARPAL
SINGH [BUKIT GELUGOR]**

TARIKH : 13 NOVEMBER 2019 (RABU)

SOALAN

Minta **PERDANA MENTERI** menyatakan sebab-sebab Ketua Polis Negara terkecuali daripada siasatan oleh IPCMC sepertimana yang telah dicadangkan dalam Rang Undang-Undang IPCMC yang telah diperkenalkan baru-baru ini.

**JAWAPAN : YB TUAN MOHAMED HANIPA MAIDIN,
TIMBALAN MENTERI DI JABATAN PERDANA MENTERI**

Tuan Yang di-Pertua,

1. Untuk pengetahuan semua Ahli Yang Berhormat, semua anggota pasukan polis tidak terkecuali daripada pemakaian atau siasatan IPCMC termasuklah Ketua Polis Negara.
2. Segala aduan salah laku yang diterima oleh IPCMC terhadap Ketua Polis Negara akan disiasat di bawah seksyen 24 sama seperti aduan lain yang diterima terhadap mana-mana anggota pasukan polis.
3. Setelah IPCMC selesai menjalankan siasatan dan sekiranya dapatan siasatan mendapati wujudnya salah laku, maka tindakan tatatertib boleh diambil terhadap Ketua Polis Negara melalui penubuhan suatu Lembaga Tatatertib Khas yang akan ditubuhkan oleh Ketua Setiausaha Negara. Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS

PERTANYAAN : LISAN

**DARIPADA : DATUK ZAHIDI BIN ZAINUL ABIDIN
[PADANG BESAR]**

TARIKH : 13 NOVEMBER 2019 (RABU)

SOALAN

Minta **PERDANA MENTERI** menyatakan apakah status pemansuhan Akta Anti Berita Tidak Benar [*Akta 803*] dan bilakah pemansuhan akta ini akan dibentangkan.

JAWAPAN : YB TUAN MOHAMED HANIPA MAIDIN,
TIMBALAN MENTERI DI JABATAN PERDANA MENTERI

Tuan Yang di-Pertua,

Kerajaan komited untuk memansuhkan Akta Antiberita Tidak Benar 2018 [*Akta 803*] selaras dengan perubahan dasar Kerajaan bahawa penyebaran berita tidak benar boleh ditangani melalui undang-undang sedia ada.

Dalam hal ini, Bacaan Pertama Rang Undang-Undang Antiberita Tidak Benar (Pemansuhan) 2019 telah dibentangkan pada 7 Oktober 2019 manakala Bacaan Kedua Rang Undang-Undang tersebut telah diadakan pada 8 hingga 9 Oktober 2019 di Dewan Rakyat. Dewan Rakyat seterusnya meluluskan Rang Undang-Undang Antiberita Tidak Benar (Pemansuhan) 2019 hasil undian belah bahagi selepas dibahas 25 wakil rakyat Kerajaan dan pembangkang. Menerusi undian itu, seramai 92 ahli Parlimen bersetuju supaya akta terbabit dimansuhkan manakala 51 lagi tidak bersetuju.

Rang Undang-Undang Antiberita Tidak Benar (Pemansuhan) 2019 seterusnya dijangka dibahaskan semasa sesi Dewan Negara pada Disember 2019.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : YB DATUK SERI PANGLIMA WILFRED
MADIUS TANGAU [TUARAN]**

TARIKH : 13 NOVEMBER 2019 (RABU)

SOALAN

Minta **PERDANA MENTERI** menyatakan apakah strategi terkini untuk memperkukuhkan keselamatan di Pantai Timur Sabah.

JAWAPAN

Tuan Yang Di-Pertua,

1. Pengurusan Keselamatan di Pantai Timur Sabah akan distruktur semula di mana ianya melibatkan penyusunan semula konsep dan kawasan operasi dan pos-pos keselamatan di daratan dan pulau-pulau antara Angkatan Tentera Malaysia (ATM), Polis DiRaja Malaysia (PDRM) dan Agensi Penguatkuasaan Maritim Malaysia (APMM).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KE-EMPAT BELAS**

PERTANYAAN : LISAN

**DARIPADA : PUAN RUBIAH BINTI HAJI WANG
[KOTA SAMARAHAN]**

TARIKH : 13 NOVEMBER 2019 (RABU)

SOALAN

Minta **MENTERI PENGANGKUTAN** menyatakan apakah trend kemalangan jalan raya di jalan persekutuan di negara ini khasnya Sarawak dan solusi bagi mengatasi masalah ini.

JAWAPAN

Yang di-Pertua,

1. Untuk makluman Yang Berhormat, berdasarkan data statistik daripada Polis Diraja Malaysia (PDRM) tahun 2016 hingga 2018, trend kemalangan jalan raya di jalan persekutuan negara ini menunjukkan trend penurunan sebanyak 19.4%. Ini dapat dilihat daripada statistik kemalangan jalan raya pada tahun 2016 yang mencatatkan sebanyak 95,206 kes berbanding 76,720 kes pada tahun 2018. Trend penurunan juga dapat dilihat dari segi angka kematian akibat kemalangan jalan raya di jalan persekutuan di negara ini iaitu sebanyak 2,200 kes kematian pada tahun 2016 berbanding 1,664 kes kematian pada tahun 2018.

2. Untuk negeri Sarawak pula, kes kemalangan jalan raya menunjukkan trend penurunan sebanyak 26.6% iaitu daripada 7,034 kes pada tahun 2016 kepada 5,163 kes pada tahun 2018. Manakala, bagi angka kematian akibat kes kemalangan jalan raya pula menunjukkan trend penurunan iaitu sebanyak 42.6% iaitu daripada 202 kes kematian pada tahun 2016 kepada 116 kes kematian pada tahun 2018.

3. Berdasarkan sumber daripada PDRM, didapati antara punca-punca yang mengakibatkan kemalangan jalan raya adalah disebabkan oleh terbabas sendiri, cubaan memotong, mengekori terlampau rapat, berhenti mengejut dan mengantuk.
4. Pelbagai agensi yang berkaitan memainkan peranan dalam mengambil langkah-langkah untuk mengurangkan kadar kemalangan jalan raya di negara ini. Contohnya, Jabatan Keselamatan Jalan Raya (JKJR) melaksanakan pelbagai program advokasi kesedaran keselamatan jalan raya kepada pelbagai lapisan pengguna jalan raya untuk memupuk kesedaran tentang keselamatan nyawa apabila berada di atas jalan raya.
5. Di samping itu, JKJR juga aktif menyampaikan mesej peringatan tentang membudayakan sikap waspada semasa memandu menerusi media sosial, sesi temu bual radio dan televisyen. Bagi golongan muda pula, JKJR berkerjasama dengan MIROS dan Kementerian Pendidikan Malaysia (KPM) dalam melaksanakan Pendidikan Keselamatan Jalan Raya (PKJR) di peringkat sekolah rendah, menengah rendah, taska dan pra-sekolah bagi menanamkan kesedaran yang jitu di kalangan jiwa muda agar menghayati budaya berhemah semasa berada di atas jalan raya.
6. Selain itu, program intervensi *My Safe Road* juga akan dijalankan secara menyeluruh di seluruh Malaysia bermula tahun hadapan menerusi peranan Majlis Keselamatan Jalan Raya Negeri (MKJR). Dengan kerjasama yang jitu daripada semua pihak yang terlibat, diharap program ini diharap dapat menurunkan kadar kemalangan dan kematian akibat kes kemalangan jalan raya di seluruh Malaysia.
7. Manakala, bagi PDRM pula giat meningkatkan penguatkuasaan dan tindakan saman ke atas pesalah-pesalah jalan raya. Di samping itu, PDRM juga mengenal pasti lokasi-lokasi kekerapan berlaku kemalangan jalan raya dengan membuat kajian punca kemalangan dan mengambil tindakan selepas kajian dibuat.

Sekian, terima kasih.